

欽定大清會典事例

欽定大清會典事例卷一百十四

吏部

處分例

本章違誤
漏洩本章
遺失本章
積壓本章

本章違誤。康熙六年題准。本章被墨汙者。將墨汙本章之員。罰俸一月。○又議准。本章內錯寫官銜。或從旁添字。或錯字者。將不加詳對之主事。罰俸一月。錯寫之筆帖式。罰俸兩月。堂官免議。今增為督撫題本內。如有前項錯誤。
亦罰俸一月。接頭錯誤。照此例議處。○九年議准。官員將題本遺漏印信者。罰俸一月。改
為罰俸一告。○又議准。批寫票籤。如將工部知道。錯

批兵部知道等類者。大學士罰俸一月。學士。今改

為批寫之
侍讀中書。罰俸兩月。○又題准督撫將奉

旨駁查案件。含糊具題者降一級留任。○又題准督撫將會議事件。並未會同議定畫題。遽稱合辭題覆者。罰俸六月。○十年題准督撫本內緊要字貼黃內遺漏。或貼黃內所有之字。本內遺漏者。罰俸三月。○十五年議准。凡官員將慶賀表文計冊舛錯。或遺漏不奏。或遺漏字樣及藉端推諉。或遲延及不差的當人。途中耽誤。以致水火盜失者。皆罰俸一年。如用印歪斜模糊顛倒。

失用。及縛寫潦草。不列職名。或破裂染汙者。皆罰俸六月。督撫亦照此例處分。○五十四年議准。凡定議事件。間有兩議者。每議各有滿漢堂官署名具奏。免議。如滿堂官與滿堂官一處。漢堂官與漢堂官一處。各自署名具奏。其奉

旨准行者。免其議處。不准行者。罰俸六月。○又議准。

凡奉

旨交九卿會議。具奏者。九卿意見相同。照例畫題。儻別有所見者。各書其意。另寫一款。一併啟奏。○

雍正二年

諭嗣後本內援引新例之處不可用新例字樣係何年所定之例止將年分寫入傳諭內閣交各部衙門通行各省○三年議准地方民務大小公事皆用題本本身私事皆用奏本如有應用題本而用奏本應用奏本而用題本者罰俸三月○六年議定凡議革議降官員除在京各官不必夾籤外官先經別案革職休致者亦毋庸夾籤外其現在議處之外官自知縣以上遇有降調革職案件及外任補授之京官因伊原任內案件議處降調革職者查明該員從前何官升補及奉有

褒嘉諭旨。或經督撫保題。並曾奉

特旨寬免者。均於本內夾籤進呈。

今增為如係督撫司道任內有降革

留任處分亦入一併敘入

○八年

諭各省文武諸臣奏摺。經朕硃筆批示者。俱令呈繳。以備稽查。但向來未定呈繳之期。以致各員遲早不一。有二三月後乘便呈繳。有於年底彙齊呈繳者。夫既奉硃批查辦此事。下次查辦奏事之時。即應將硃批原摺呈繳。以備朕之檢閱。若具奏此事。而仍留硃批。原摺於外。則朕處無檔案可稽。未免難於辦理。著通行曉諭。凡接到硃批者。仍照舊乘便呈繳。若具奏此。

事。應將原批一併呈進。若所批查辦之事。尚未就緒。
准將硃批存留。俟辦理具奏之時。一併呈繳。○十二

年覆准。凡各部院題奏內會稿事件。有應行之

處。皆責令主稿衙門通行知會。不得推諉遲延。
以專責成。如有推諉遲延及遺漏之處。將主稿

衙門照例分別議處。

今增為武職駐紮地方。文
衙門不能偏悉聽兵部自

行行文。其餘各部院會稿事件內應行之處。俱
責令主稿衙門通行知會。推諉遺漏者俱罰俸

一年。遲延者照事件
延例。按月日查議。○乾隆四年奏准。屬官呈

請上司代題代奏事件。如將實在情節不行逐
細聲明。含糊呈請。將呈請之員降一級留任。○

五年議准。凡交代遞延。承審遞延。與承緝承追。
不力事件。該督撫不必具題。止照例限咨明各
部。其處分入稟題完結。○又議准錢糧盜案限
滿之日。該督撫停其具題。止咨各部覈明。聽該
部照例處分具題。○又奏准。凡現任州同縣丞
以下微員。遇有革職解任事故。年老有疾休致。
並患病調理丁憂終養等項。經各督撫咨送到
日。皆照例行文辦理。一面開缺銓選。一面照例
稟題。遇有降罰處分。亦照例稟題。降罰革職解
伍。均係一月稟題。老病休致患病調理丁憂終

養均係半月奏題。其候補州同縣丞以下微末職銜督撫咨參到日。照例據咨斤革均附入一月奏題。○七年議准。凡題奏內校對冊籍事件。如司官未經詳查。致有遺漏舛錯者。將司官照例議處。未經查出之堂官免議。○十三年

諭向來各處本章有題本奏本之別。地方公事則用題本。一己之事則用奏本。題本用印。奏本不用印。其式沿自前明。蓋因其時綱紀廢弛。內閣通政司藉公私之名。以便上下其手。究之同一入告。何必分別名色。著將尙用奏本之處。概用題本以示行簡之意。○又

諭鄉賢崇祀所謂祭於瞽宗必有功德可稱方足膺茲
鉅典近來率以仕宦通顯者當之已非穀實之道今
雲南巡撫題請原任侍郎許希孔崇祀鄉賢本內則
更有過甚其辭者許希孔本一硜硜自守小心之人
在朝未有所建立但曾為鄉貳或者居家孝友滇省
人物寥寥節取充數自無不可而本內乃有文堪華
國品足型方二語朕則知實非許希孔所能當案呈
內又以湯斌陸隴其為比許希孔何如人豈可方之
湯斌陸隴其儕人既不於其倫且本朝臣工不書其
名而稱為陸當湖湯潛庵尤非奏章之體此等幕賓

沿襲套語。明季已成濫觴。然彼時即軍國重務。人君尚概不經目。何論尋常章奏。我朝

家法通本部覆。無不詳細披覽。督撫題奏事件。豈可勦
襲陳言。任意草率。今後有似此者。必加處分。此本著
發還該撫。另行具題。○十九年

諭戶部議覆陝西巡撫奏請估變西甯縣庫收貯綏延
一摺。此案先經該撫咨請部示。戶部以不便據咨遠
議駁令具奏到。再行辦理。一切政務。惟論其事之
可行與否。若事在可行。督撫業已咨部。該部復行令
具奏。及奏到之時。原不過照議覆准。徒多往返案牘。

之煩甚屬無謂。况部臣奏准與督撫自行陳奏。又有何別耶。嗣後督撫咨商各部事件。著該部將應駁者即行咨駁。應准者亦即定議奏聞。毋得沿襲陋習。仍以具文從事。○二十四年議定。各部院題覆案件。無論科鈔轉咨於具題本內。俱將原奉

諭旨日期載入。以憑查覈。○三十年奏准。各省督撫大臣。將應題應奏事件。違例移咨部院者。毋庸駁令題奏。即據咨文分別辦理。應題者即行具題。應奏者即行具奏。仍將違例之督撫等隨案查參。照違令律議處。如各部院衙門。不據咨題。

奏。任意推諉咨駁者照推諉事件例議處。○又奏准。部院將應結之事駁查者。該稽查之科道。查出參奏。將該司官罰俸六月。堂官罰俸三月。○又奏准。議敘案件。間有重複錯誤。原卷可以查明者。即查明改正。准予議敘。不得藉端駁查。巧為需索。如混行駁詰。照應結駁查例議處。或不肖官吏。藉此需索。交刑部治罪。○又奏准。各部院衙門欽奉漢字。

上諭及行文外省事件。仍照例止用漢字。其餘一切內行文移。務須兼寫清漢。不得仍寫漢字黏單。

如仍有怠於繕寫。令各堂官查叅。照文冊外錯
例罰俸三月。○又奏准各部院所領三庫銀緞
顏料等項。務於下月初十日內。造具細數總冊。
並原稿咨送都察院交江南道按月查覈。呈堂
稽查於年底彙題。儻不按月咨送。遺漏遲延。及
數目不符。該道叅奏。照部院衙門事件遲延註
銷。遺漏例分別議處。儻有重支冒領等弊。該道
不行查叅。別經發覺者。將該道照不行詳查例
罰俸六月。該堂官照疏忽例罰俸三月。○又

諭。內外各衙門題奏事件。遇有地名字面。理應遵照全

寫乃向來章疏止圖省便每將地名節稱一字其謬不可枚舉如熱河之但稱為熱多倫諾爾之但稱為諾則其尤甚者嗣後凡有地名字面一概全寫不得僅趨簡易致乖體制○三十一年

諭前因各省奏報動用耗羨章程各摺批交該部知道者仍令戶部按例查覈辦理不得僅以動支各數存案了事並令將辦過准駁各案於年終彙奏至於吏部甄別教職佐雜兵部之千總定以六年俸滿分別保薦留任勒休並令各督撫於年終彙奏原恐督撫等或曲意姑容致有衰庸戀棧是以批令該部知道

以便比較查覈。若一概存而不論，則亦毋庸批交該部矣。蓋此等甄別年滿員弁，其列入保薦者，合例與否，俱由部覈議請旨，惟例應留任之員，該部止照督撫等所議存案，向未復加查覈。但各員弁分別留任，初次定以六年，迨下次再行甄別時，前後已有十餘年之久，其中豈無衰邁龍鍾，年歲已逾定例之人？若該督撫等或因循姑息，不行裁汰，該部又以向無查覈之責，聽其蒙混濫竽，殊非覈實官方之道。嗣後著各該部遇有此等照例彙奏事條，及一切督撫等題奏，經朕批交該部知道者，將應否准駁之處，俱於年

終詳查覈議具奏○三十三年

諭嗣後八旗宗人府凡有行文外省事件俱行該部轉行不得徑行外省將此永著為例○又奏准各部院及八旗都統等衙門一應文移俱令本衙門填寫日期儻有僅寫年月不填日期者許收文衙門於每月註銷時送該科道驗明於註銷本內聲明附參照造報各項文冊遺漏劄罰俸三月儻各衙門有收受無日期文書及自填日期經該科道等查出一併題參將收文三行查出之員照失察檔案例罰俸兩月自填日期者照增

減官文書例罰俸九月。○三十四年

諭聞向來御門日期奏事處人員遇各衙門及科道封口奏章概不轉遞此乃伊等拘泥舊例甚屬無謂朕總理庶政凡內外臣工奏章無日不進御披覽豈有納之於平時而於御門聽政之日轉卻而弗納之理且御門不過片刻既退仍照常辦事亦屬兩不相妨而此等封口奏章或係糾彈或關建白其中緊要之事並有須即予施行者若既至宮門復行駁回於公務既不無延緩且恐無識者致疑封函有壅於上聞之事於政體亦屬未協在前明朝政廢弛君上每不

樂親為聽覽。臣下望風希旨。往往藉故稽留。以售其
蒙蔽之術。我國家綱紀肅清。朕夙夜孜孜。勤求治理。
奏牘上陳。豈宜稍有屏遏。嗣後御門日期。凡有封奏
事件。俱著一體接收。呈覽。著為令。○又議准嗣後恭
遇

諭旨內有宣示中外知之者。令內外文武該管旗民
各衙門。俱刊刻謄黃。張挂曉諭。儻仍前不行宣
示者。照經手遺漏例罰俸一年。○三十五年
時。按鎔化淨鐵之數折給應需驛車。照例撥用。先經
諭。雅德奏查辦收存。尙舊盔甲。俟吉林等處需用鐵斤。

咨部請示茲准兵部行令具奏再議等語。兵部所辦
非是前因各部院將應行奏辨事件。駁回該處令其
自奏以致輒轉稽延最為惡習屢經嚴切飭諭並定
有咨駁處分今兵部辦理此案何得復行駁令自奏。
著將該堂司官交部議處並再行通諭部院八旗各
衙門嗣後凡遇各該處請示咨報之案除有例可循
者仍照常覈議咨覆外若係必須奏請定奪之事無
論應准應駁即著據咨議准議駁奏聞並將應奏不
奏之大臣等附參交議不得狃於推諉錮習貽誤公
事儻不知悛改復蹈故轍一經查出定將違例咨駁

之大臣等一併嚴加議處著為令。三十六年

諭昨閱工部題銷順天庚寅科鄉試添補器具等項一本表曰修即係兼管順天府之人乃於工部堂官內仍行列銜以自行報銷之案旋復自行考覈於事理實屬未協在同堂大員秉公覈實或不敢彼此瞻顧而司員書吏人等以承辦之人現為本部堂官豫操覈銷之柄難保無畏懼迎合情事何可為訓由此類推如戶工二部錢法堂侍郎專管局務若遇本部覈奏時該侍郎亦行列銜均非覈實辦公之道嗣後在京各衙門凡有似此者俱著一體迴避著為例。又

諭。前據范宜賓奏各省藩臬陳奏事件不應先行呈送督撫一摺。曾諭令各該督撫明白回奏。今據先後奏到十餘處。大率稱督撫藩臬於奏報收成晴雨等事。恐其錯誤。往往互相質證。至條奏地方公事兩司亦有稟商督撫者。若不呈閱。亦不向其索看等語。朕殊不以為然。向來藩臬條陳。不過各就該省之錢穀刑名事件。摭拾敷衍。朕或批交督撫議覆。或批令告知督撫。酌量可行則行。是地方公務原不妨彼此商榷。其事轉無甚關礙。至收成晴雨等事。令藩臬亦得專摺奏聞者。誠以水旱豐歉情形。事關民隱。冀得互相

參覈。不致粉飾欺蒙。以收兼聽並觀之益。若彼此商
同入告。依樣葫蘆。無裨覈實。則督撫一奏足矣。安用
是重見疊出者為。至若督撫果有不公不法之事。藩
臬聞見既真。原應據實入告。然朕並不以此責之。兩
司俾得鈐制上官。致開告密之漸。而兩司從未有劾
奏督撫者。即如近年以來。良卿方世雋等枉法營私。
為天道所不容。惡迹自然敗露。各正刑誅。而該省藩
臬初何嘗於朕前奏及一語。則大吏之自取重戾。又
豈必待兩司之舉發乎。且督撫既膺委任。豈轉不及
藩臬之足信。朕亦不肯過為逆億。若使藩臬中實有

廉正可信。逾於督撫者亦即以督撫任之。又何肯不
加擢用。轉令其隱為糾伺乎。總之整飭吏治之大要。
惟恃朝廷綱紀肅清。自不敢有扶同蒙蔽之事。初不
在乎設法峻防。若燭照稍有不周。則雖檢制加嚴。適
以滋弊。此為君之難也。即如近日范宜賓與胡文伯
意見牴牾。朕因高晉奏到。留心查覈。初未有所偏向。
及見胡文伯在任辦事種種未協。難以復膺封疆重
寄。因予罷斥。並非由范宜賓之劾奏。而范宜賓查奏
捕蝗不力一事。彼亦同干吏議。又何嘗因其不畏巡
撫特為獎賞乎。朕辦理庶務。惟崇實政。不欲斤斤於

禁令之具文。呈閱摺稿一節。督撫與聞及不與聞皆無關事理輕重。如兩司慎密自矢。固屬分所宜然。設欲藉此為詔事逢迎亦彼自甘庸下。總不能逃朕之洞鑒。督撫等覆奏之初。曾交軍機處彙齊再奏。今奏到定奪者已及大半。想續奏者亦不過如此。毋庸俟奏齊再為定議。即以此明降諭旨通諭中外知之。○

三十八年

諭本日御史天保馬人龍奏監考教習。查出代倩之弊一摺。已交部查辦至其摺內書銜。因天保在前。遂概稱奴才。向來奏摺滿洲率稱奴才。漢官率稱臣。此不

過相沿舊例。且亦惟請安謝恩。及陳奏已事。則然。若因公奏事。則滿漢俱應稱臣。蓋奴才即僕。僕即臣。本屬一體。朕從不稍存歧視。不過書臣覺字面冠冕耳。初非稱奴才。即為親近而盡敬。稱臣即為自疏而失禮也。且為君者。豈繫臣下之稱。臣稱奴才為榮辱乎。今天保馬人龍之指如此。朕所不取。若不即為指斥。恐此後轉相效尤。而無知之徒。否或因為獻媚。否或竊為後言。不可不防其漸。即如各部院衙門題奏。摺本雖至微之筆帖式。無不稱臣。又何用強為區別於其間耶。嗣後凡內外滿漢諸臣。會摺公事。均著一體。

稱臣以昭畫一著為令。五十四年奏准。凡內外議處官員題本內除奉

特旨交部議處者。毋庸夾單外。其隨案參處聲敘職名。或未送職名。查取職名。或咨送尚有遺漏。補送職名者。吏部本上時。俱令摘敘案由略節於本內夾單。一併進呈。○嘉慶五年奏准。京官三品以上議敘處分開復。俱專案具題。四品以下降革處分專案具題。其降革留任罰俸處分。以及議敘開復。入於十日彙題。外官三品以上議敘開復。及降革處分。俱專案具題。道府降革處

分及降革後開復原官者俱專案具題

降調處
分有加

級抵銷者亦
專案具題

其降革留任罰俸等項處分以及

議敘並開復降革留任等項又數案降革止開

復一二案者俱入於十日彙題承倅州縣降革

處分及降革後開復原官者俱專案具題其降

調處分有加級抵銷並降革留任罰俸等項處

分以及議敘開復降革留任又數案降革止開

復一二案者俱入於十日彙題教職首領佐雜

議敘處分開復俱入於一月彙題盜案處分另

作一項一月彙題州縣以上降調未補及革職

官原任內處分俱入於十日彙題其降革之案。

奉

旨引

見奏原任內復有降革處分照丞倅州縣現任之例分別專題彙題○又奏准京官三品以上告病告休由本衙門具奏奉

旨後知照吏部四五品以下告病告休具呈本衙門咨明吏部由考功司移付稽勲司入於半月彙題督撫告病告休自行具奏藩臬告病告休由本省督撫代奏道府告病告休由本省督撫具

題奉

旨議奏者。吏部專案題覆。丞倅州縣告病告休亦由該督撫具題。教職首領佐雜告病告休。該督撫咨明吏部。俱由考功司移付稽勳司。入於半月彙題道府以下。在京告病告休。具呈吏部。在途告病告休。由該省督撫咨部。道府專案具題。丞倅州縣以下。考功司移付稽勳司。入於半月彙題。○又奏准題奏應密不密。不應密而密者。俱各罰俸六月。○又奏准官員妄行條奏者。照言官撫拾具奏例降一級調用。妄行指摘者。照與

前任不含有意苛求例降二級調用。○又奏准各處印文到部該收文司員不行回堂擅自駁回者照不應重私罪律降三級調用。○又諭嗣後凡遇齋戒日期如

圜丘

祈穀

常雩親宿齋宮之日各部院仍照向例不進本章至

方澤

太廟

社稷壇致祭之日內除刑部不必進本及各部院外省

本章有關涉刑名者。俱不呈進外。其餘尋常事件。著各該衙門照常進本。即以本年

方澤大祀為始。著為令。○又

諭。向來外省各督撫。遞發本章及摺奏事件。皆先行跪拜。親授所差員弁捧齋理固宜然。至在京王公內閣部院八旗各營大臣等。應奏事件較多。固非外省可比。然亦應親身遞奏。乃近來王公大臣等。日久相沿。多不親赴宮門。率令護衛太監司員筆帖式章京驍騎校等代為遞奏。殊非敬謹之道。嗣後各王公大臣等。於自行陳奏事件。務須親自呈遞。即如各旗衙門。

公遞事件亦應輪直堂官一人遞交奏事官員轉奏。如有仍前派交護衛太監司員章京等代遞並無一人親到者。奏事官不准接收並將該堂官交部議處。

○又議定不親身遞奏照推諉曠班例罰俸一

年。○七年

諭近來臣工等遇有派令兼署部旗事務或具摺謝恩或僅在道旁叩頭不復繕摺陳謝前經降旨令滿漢文武大臣有派令兼署部旗事務僅在一月以內者不必專摺謝恩嗣後滿漢文武大臣仍遵前旨於署缺在一月以外者均具摺陳謝以符體制。○八年

論。明亮奏烏魯木齊所屬地方應辦刑名錢糧漢字事
件較多。請仍令原任山西潞安府經歷陳聖域辦理
一摺。著照所請行。惟摺內將烏魯木齊截去下三字。
於文義殊屬不合。向來各省地名如用漢文書寫已
不應僅用一字。若於清文內率行裁截尤不成話。嗣
後內外各衙門遇有陳奏事件。於應載地名。惟當全
行書寫。不得任意截去。○九年

諭。嗣後外省各督撫。凡遇題本年月日。俱不准空改。一
有錯誤。即著另換一折黏尾接寫。仍將黏接之處鈐
印。以杜弊端而符體制。○又

諭

前因原任河道總督嵇承志具奏本章七件均將本
章後寫五月字樣空補蓋印特降旨令嵇承志明白
回奏並交徐端詳查其中有無情弊茲據徐端奏稱
查得此項題本均係循例應辦之事該本房經承先
將正本填寫四月前因字頁過繁查對有需時日至
五月初二日始行拜發是以空補五月字樣係在未
奉定例以前委無別項情弊此事雖查無弊竇但嵇
承志於進呈本章並未敬謹詳閱任令書吏於用印
處空改究屬不合嵇承志著交部議處欽此○又
旨議准嗣後本內空補年月者罰俸六月○又

諭六部衙門。政務殷繁。臣工等理宜敬共朝夕。遇有應奏事件。隨時陳奏。方免叢脞之虞。從前我

皇祖世宗憲皇帝。因駐蹕圓明園。道路稍遠。特令文職各衙門輪日奏事。原以示格外體恤之意。至進宮後。各衙門並不輪班直日奏事者。原以宮廷密邇。無難日日進內。乃近來各部堂官意圖安逸。每聞有御門日期。將應奏事件及引見人員。俱於是日彙齊奏辦。其前後兩三日間。竟不入內奏事者絕少。朕留心察看。已非一次。朕未明求衣。燈下辦事。同此勞者。惟軍機內廷數人耳。別部堂官遇應奏事件。及應帶領引

見人員延玩不奏在家高臥以避曉寒於心安乎於
理得乎京員如此怠惰外任尚可問乎即如本日御
門後吏部帶領月官正黃旗直日帶領引見俱屬照
例按期辦理而禮部兵部及三庫亦均於此日帶領
引見實屬趁便試思禮兵二部並非吏部月官可比
而三庫引見之事更屬無多何以必於今日帶領朕
日理萬幾從不稍延晷刻並非因本日事多略有憚
煩特因兩日前各衙門奏事太覺寥寥耳前月三十
日永思殿用膳辦事僅有都察院步軍統領衙門陳
奏事件昨日又止有鑲黃旗引見官十三員禮兵等

部及三庫應行引見人員。何不可移前帶領。而必湊集於御門之日。謂非有心積壓希圖便逸。而何此內如內廷行走諸臣。每日進內本無可偷安。自係外廷各員。憚於早起。故乘御門奏事之便。相率為此。殊非敬事之遂。至小京堂衙門事務較簡。該堂官甚至日高未起。而於進署辦事。猶復各定堂期。此等積習。豈所謂靖共匪懈者乎。朕此時不難降旨令各部堂官。每晨趨直。以儆怠惰。但念此中尚有年老諸臣。趨走維艱。朕亦不為已甚。嗣後各部臣務。宜力加振作。於應辦之事。隨時陳奏。即朕拜廟拈香各處。所無不照。

常辦事。非務游觀。各衙門儘可呈遞奏章。其有可帶
領引見之處。並應酌量帶領。何必因朕偶有臨莅。輒
稱不便奏事。自耽安逸。轉以為仰體朕躬耶。著將此
旨通諭六部衙門各堂官共知。各省各思夙夜在公
之義。無負朕奉奉訓誨至意。○十年

諭。每年十二月中。各省文武大臣。及新疆各等處駐紮
之將軍大臣等。均有恭賀元旦奏摺。自應以時呈遞。
嗣後外省及新疆各等處。具奏慶賀元旦之摺。著以
十二月初十日以後。二十五日以前為率。總於此半
月內一律遞到。毋得前後紛歧。有乖體制。○十一年

諭滿漢文武大臣等。年逾六旬以外者。前經准令於趨朝入直之期。差人先遞膳牌。以示體恤。至遇有自行陳奏事件。及本身謝恩等事。自仍當躬親呈遞。其年在六旬以内者。無論膳牌摺奏。俱不准差人代遞。該文武大臣等。各宜懔遵訓諭。嗣後儻復有幸意差人代遞者。奏事官著不准接收。○又奏准督撫將奉旨駁查事件。含糊具題者。降一級留任。其屬員呈請上司代奏代題事件。如不將實在情節逐細聲明。含糊呈請者。將呈請之員。降一級留任。該上司並不查明。率行代為題奏者。罰俸一年。○十

二年奏准各省具題本章。通政司於交送內閣之日。即將揭帖備文移送各衙門辦理。並聲明交送內閣日期。以憑查覈。本內年月日俱不准空補。如蓋印之處有空補痕迹。即照書寫違式之例。票

旨飭行。仍將經手人等分別究辦。○十三年

諭。朕每日召見各部院衙門尚書侍郎及卿員等。詢及該衙門事務。或伊等將現辦案件。自行奏言。及退出時。轉向同官傳述。即為業經奏明。請旨遵辦。朕輪次召對臣工。一時面諭之言。豈能向其同署。諸臣徧行

曉示而本人一經傳述。各同官又不敢復行請旨。其中每不免有隨同遷就之弊。且各部院事件。如同官尚未公商定議。本不應於獨對之時。先行奏探意旨。或其人先有異見。於召對時。輒以意敷陳。及出述時。辭氣抑揚輕重之間。復稍增減。而同官莫能辨正。則以影射漸啟專擅。其弊尤不可不防。嗣後各部院衙門臣工。經朕於召見時。詢及現辦事件。或有面諭之言。本人退出後。傳知各同官。俱著於次日公同繕片。述旨。如所述不誤。發下後。再行遵辦。或所述事件。其人面奏之辭。與該衙門現在公同商辦之處。情節不

符即著於奏片內據實聲敘另候諭旨遵行此係朕
防微杜漸之苦心各臣工等懔遵毋忽○又

詒朕此次由熱河回鑾於途次要亭時部旗文武各衙
門尚有附本報陳奏事件者至前日駐蹕南石槽各
衙門即無附報具奏之摺。本日朕回園已閱一日惟
吏部奏事帶領月遼各員引見其餘各衙門並無一
陳奏事件者。豈有五日之久在京文武各部院二十
四旗無一件可奏之事在該堂官之意自以為甫經
回蹕若仍照常奏事恐致披閱煩勞殊不知轉增朕
之煩悶矣朕綜理庶務從不厭繁多乃各衙門將應

奏事件。相率延閣。勢必積壓多件。併於一日呈遞。轉致叢冗。殊非朕萬幾無曠之意。本應加以懲處。惟念該衙門或有事務較簡。本無應奏事件者。此次姑免逐一查究。但大小臣工因循怠玩。甚有關繫。不可不加以訓誡。除吏部本日業經奏事外。餘俱著傳旨嚴飭。此後文武各衙門。若仍似此。將應奏事件有意積壓。必當隨時懲處。不貸。○又

諭朕因部院衙門向來辦事。每多因循延閣。節經降旨訓諭。乃昨日遞事者。僅止禮部會同內務府奏事一件。除此無一詳陳奏者。又無一引見人員。本日則各

衙門多有陳奏事件。並各帶員引見。兩日之間事務繁縝不同。殊非認真辦公之道。嗣後各大臣務宜恪勤供職。隨時辦事。隨時具奏。毋得稍存遷就觀望。致有耽延。若再有積壓不奏者。即以違旨論罪。其無悔。

○十四年

諭。本日係刑部輪班直日。止有三名引見官員。並未奏事。當經召見尚書金光悌。及滿漢侍郎等。詢以該部因何未有陳奏事件。據稱本日係恭寫。

神牌吉期。若早聞刑部遞摺。正與書寫時候相值。是以未經專摺奏事。刑名本章。仍照常恭進等語。所見殊。

屬拘況該部即因本日係書寫

神牌吉期或將處決重案暫緩陳奏其尋常事務儘可
於早間奏遞乃率將一切事務全行閣壓因循疲玩
刑部堂官均著傳旨申飭嗣後各部院衙門如再有
假託避忌實圖安逸者定行懲處不貸○又議定各
部院摺奏事件如有

特降諭旨應俟內閣發鈔欽遵辦理外仍將原摺並
所奉

諭旨鈔錄移送內閣與具題紅本一併收存以備查
覈其由奏事處口傳

旨意該衙門於領出後即於摺面恭繕

諭旨鈐蓋印信與奏稿一併存案仍於月終將一月所奏事件摘敘事由並恭錄所傳

諭旨移交外奏事處互相覈對以昭敬謹○十五年諭萬承風具題學政任滿一本朕詳加披覽其年月未經另貢書寫已照擬飭行矣至其所書前銜有內廷供奉字樣尤為不合會典所載官職本無此等名目若萬承風因在尚書房行走則周系英黃鍼俱係尚書房南書房行走之員同日題接替學政各本並未列有內廷供奉前銜萬承風何得任意形諸章奏著

交部察議伊原係尚書房行走。本欲俟到京之日。仍令其在尚書房行走。今觀其近日情形。念念不忘內廷。殊屬躁妄。不必在內廷行走。嗣後凡在內廷行走人員。於奏牘內止列本銜。不得再書內廷供奉二字樣。以符體制。○十七年奉

旨。松筠等奏。因未親遞月摺。請交都察院察議一摺。昨日兵部呈遞月摺。有堂官三人到圍。俱經召對。吏部呈遞月摺。堂官並無一人來圍。奏事處未敢將月摺接收。茲該堂官奏請處分。固係咎有應得。但查詢松筠鄒炳泰係在本部開印。桂芳陳希曾覲音布帥承

瀛各赴內務府錢局本旗開印尚非無故曠班惟未
曾公同商議酌分一二人來圍其過止於疏忽所有
奏請察議之處俱著加恩寬免嗣後遇事各加意勤
慎○又

諭本月十八日據明志成格聯銜具奏現屆軍政之期
分赴保定寶坻等處校閱駐防官兵當即召見訓諭
據奏定於二十二日起程其明志所兼護軍統領成
格所管錢法堂印鑰並已派員署理本日明志成格
復聯銜遞摺請訓殊屬重複嗣後在京大員出差俱
著於啟程前一二日具摺請訓召見後各按期前往

母得重複具摺。二十一年議定嗣後王公大臣及各衙門官員。如有已將奏摺呈遞。復向奏事處私行撤出者。照不應重私罪律降三級調用。奏事處官員聽其撤下。照不應重公罪律降二級留任。二十四年

諭嗣後凡遇應用黃摺奏事時。其刑名事件。俱毋庸黏貼黃面。以歸畫一。○又議定官員黏貼摺面錯誤。照違令公罪律罰俸九月。○道光四年奏定題奏事件。如有止圖省便。將官名地名節稱一字。烏魯木齊提督稱為烏提。熱河但稱為熱多倫諾爾。但稱為諾之類。以及列銜列

名不符體制者

如知州知縣但書為某牧某
令止稱某姓不列其名之類俱

罰俸三月○又奏定各省題奏命盜案件當於

州縣之下犯名之上添寫旗人民人字樣以清

眉目如有於州縣下直接犯名以及捏寫字面

致乖文義者

如賊犯係屬回民即捏寫為回賊之類俱罰俸三月

○八年奏定部院衙門將

特旨議處議敘事件歸入彙題者司官罰俸六月堂

官罰俸三月○十年奏定各省題本違式錯誤

通政司未經看出者承辦官罰俸三月堂官罰

俸一月若內閣漏票飭行亦照此例議處○又

奏定。凡各衙門陳奏事件。奉有

諭旨除

御前大臣軍機處內務府

南書房四處例准本日述遞外。其餘部院衙門俱

應於次早述

旨。儻該堂官有於本日述遞者。罰俸六月。奏事官率行接收。亦罰俸六月。

漏洩本章。○康熙十七年議准。凡奉

旨事件未到部之先。即行鈔傳報知者。將傳報之人交部治罪。該科給事中罰俸六月。○雍正五年

議定。凡陳奏本章除尋常通行事件照舊承辦外。凡關涉緊要之事。督撫提鎮陳奏本章。將副本揭帖用密封字樣投遞。通政使司收到密封副本。堂官親拆。別載冊籍。封固收存。各部院收到密封揭帖。堂官親拆。交司官密行收存。謹慎辦理。其督撫提鎮有緊要事件。及緝拏人犯之案。移咨各部院亦密封投遞。各部院堂官親拆。交司官承辦。在京各部院有緊要事件。文移咨呈。亦必密封投遞。其知照各省督撫提鎮文書。亦必密封遞發。該督撫提鎮親拆收存。各省督

撫提鎮以至州縣。往來公文。亦將緊要事件。密
封投遞。各本官親拆收存。如將應密之事。並不
密封。以致漏洩者。將封發官查參。如收受承辦
官不行謹慎。以致漏洩者。將收受之承辦官查
參。事理重者降一級留任。輕者罰俸九月。科道
官查出不糾參。罰俸六月。今改為如封發官將
應密之事並不密封
或收受承辦官不行謹慎。以致漏洩者。降一級
留任。稽查該衙門之科道官不查出糾參。罰俸
六月。○又議准。凡提塘與衙役人等。漏洩密封事
件。仍照定例分別議處外。其雖非密封。但未經
御覽批發之本章。即鈔寫刊刻圖利者。該管官失於

覺察該管科道不行查參。皆照漏洩密封事件
例分別議處。後改為該管官罰俸一月。該管科道罰俸六月。其已經

御覽批發之本章。應令承辦官詳細校對。敬謹傳鈔
奉行。如有增減錯漏者。將承辦校對之員。照錯
誤本章例議處。○乾隆十八年奏准。各省督撫
提鎮將軍等嗣後本箱用本官封皮黏固鎖口
用印信加封於火牌傳牌內。將箱子數目明白
開寫。稅務司驗有封皮印信者。即知係本箱。不
得擅開。當刻放行。如驗無印信者。即確實驗明。
如夾帶私貨。立即報通政司等衙門。將承差送

刑部治罪。庶弊端永絕而本章亦不致洩漏矣。

○嘉慶四年

諭各部院衙門文武大臣各直省督撫藩臬凡有奏事之責者及軍營帶兵大臣等嗣後陳奏事件俱應直达朕前不許另有副封關會軍機處各部院文武大臣亦不得將所奏之事豫先告知軍機大臣即如各部院衙門奏章呈遞後朕可即行召見面為商酌各交該衙門辦理不關軍機大臣指示也何得豫行宣露致啟通同扶飾之弊耶將此通諭知之○五年奏准密奏事件未經發鈔不得互相談論如有洩

漏照漏洩密封事件例議處。九年

諭。本日大學士滿漢尚書及原審大臣會同議奏。初彭齡等罪名一摺據稱初彭齡冒昧參劾已屬陳奏失實。此語非是朕從不因言事罪人最喜敢言之臣。此實素懷至密陳面諭事件私向高杞傳述竟照漏洩機密重事律擬以斬監候尤為過當竟係諸臣欲杜言事者之口必有不可令人知之事矣。此案先經初彭齡往見高杞問及吳熊光操守高杞答以實屬廉潔。初彭齡不肯深信議論吳熊光聲名平常旋據高杞告以秦泰餽送一事。初彭齡據以入奏並密陳得

受匣費。及吳熊光親家李世望代為營運二款。迨召見時。朕諭以此事交全保查辦。恐未肯和盤託出。伊奏稱若嚴切降旨。全保自不敢稍為徇隱。朕又以吳熊光如果贓款屬實。則李世望代為營運之處。亦當交汪志伊查辦。初彭齡奏稱汪志伊查辦甚好。伊出見高杞。即將召對所奉之旨。向高杞傳述。其獲罪實在於此。即照洩漏常事律加等罪。亦不過褫職遣戍。何至輒引近侍官員漏洩機密重事律擬以大辟。況臣工必遇事敢言。方可祛除壅蔽。凡關繫弊端及臣僚中不公不法等事。既有所聞。本應即行陳奏。候朕

密為查察。若所奏屬實。亦係分所當言。不足為功設。其中未盡確實。朕準情酌理。自有權衡。必不致無辜被累。若概諉諸。尚無確據。勢必其事破露。罪狀昭著。始行入告。何如早行發覺。轉不致釀成鉅案乎。初彭齡風聞不實。原無可罪。至於漏洩一節。亦當按事之大小。以定罪名輕重。朕召見臣下。所降諭旨。均不可視為泛常。然漏洩之罪。必視其所透漏者。究屬何事。關繫何項。緊要機宜。方可照漏洩機密重務擬罪。今初彭齡所漏洩者。止係將諭令全保。汪志伊查辦之旨。向人傳述。尚非別有重大情節。且亦尚未交汪志。

伊查辦。若遽照前律擬斬設遇有漏洩軍國重務者。
其罪更何以加乎。且現在預議該大臣中即皆常經
召對之人試各捫心自問。豈能盡守口如瓶毫無漏
洩。設有一二傳播之言。被人指摘。若俱照此例辦理。
既於政體有乖。亦甚非諸臣之福也。即如本日召見
申諭之旨。諸臣自當祗服訓辭。互相戒勉。正應向僚
佐傳說。亦豈得謂之漏洩乎。初彭齡平日陳奏各事。
除現在所辦銅案外。其餘亦多非確實。然朕所以諄
諄訓諭。欲保全敢言之臣者。並非為初彭齡一人。誠
以大臣中建白者少。而緘默者多。即多方激勵。尚恐

不肯盡言。若將初彭齡問擬重罪。恐外間無識之徒妄生揣摩。或疑朕於初彭齡厭其多言。科以他罪。從此箝口結舌。惟事模棱。必致壅蔽日多。於政治大有關係。初彭齡本應革職發往新疆。姑念其現有老親著革職加恩令其在家養親。閉門思過。此朕因初彭齡言事之心尚屬可原。是以格外施恩。亦所以風勵臣工。勉為審謬也。高紀以二品大員本有言事之責。經朕再三詢問。吳熊光操守伊既力保其廉潔。而於魏耀傳說餽送之語。當時不行陳奏。轉向初彭齡詳述。實屬巧詐。著照議發遣伊犁。令其自備資斧前往。

交與將軍松筠派委苦差。效力贖罪。魏耀惟知迎合
上司。以毫無影響之賊私重情。汙蔑總督。著即照擬
總徒四年。除將預議大臣等面加訓飭外。著將此案
辦理緣由通諭知之。○又

諭昨日召見尚書德瑛。詢以留京王大臣遇有陳奏事
件。何人繕辦。據稱俱煩在京軍機章京辦理。殊屬非
是。從前軍機大臣中有派令留京者。是以該章京隨
同辦事。近年來留京王大臣並無軍機。然俱有該管
衙門。其屬員中豈無能辦章奏之人。何必交軍機章
京代為辦理。將應辦公事轉似煩情耶。且與留京王

大臣浹洽日久。恐不免有探聽漏洩情事。朕在藩邸時。即確有聞見。嗣後留京王大臣。著於宗人府及所管之部。各派明白妥幹二三人。承辦諸務。以符體制。

○十六年

諭向來九卿科道等遇有條陳糾劾。俱係封章入奏。呈遞時面交外奏事官。轉交內奏事太監。直達朕前。拆封朕親行披覽。其摺內所奏何事。無論外間不應有人傳播。即內奏事太監等亦無由得見。杜漸防微立法。至為嚴密。上月二十八日。御史韓鼎晉奏內城有開場聚賭之事。當命軍機大臣傳到該御史。詢以所

指何人。即於二十九日由該御史自行覆奏。朕始諭令步軍統領祿康等密行查拏。節據先後拏獲賭局共一十六起。內有八起於五月二十八二十九兩日散局顯係得信逃匿。此非有人洩漏。或有人探聽御史條奏此事。潛向告知致令逃逸而何。此時朕姑不深究其人。嗣後九卿科道等有條奏事件。如呈遞之前。或奏事處及在朝之人。向其詢問所奏何事。著即行指名參奏。若無人詢問而具摺陳奏之後。或向外人敘說。亦著聞其言者立即揭參。均當加之懲治。庶不致嘉猷入告。以採納之資。啟漏言之漸。蓋君不密。

則失臣。朕斷不肯先行曉諭以致敢言之臣招怨而
臣不密則失身。近日此風甚熾。朕生平最惡者。探聽
朝政。先欲得信之人。樞機之發。榮辱所關。有不可不
慎者。毋謂朕誥誠之不早也。如敢干犯。決不輕恕。

道光十六年

諭近日外間傳閱私鈔。多有未經發鈔之件。如本日某
衙門直日。召見某人。科道某遞封奏一件。此等探事
惡習。本于例禁。且刊刻私鈔。纖悉畢登。不但洩漏滋
弊。甚非所以崇政體而昭嚴肅。嗣後著御前大臣飭
令奏事處。直班章京等嚴行查禁。毋許再有訛傳私

鈔以昭慎密。僥倖禁不力。仍蹈前弊。惟該大臣等是問。

遺失本章。○康熙六年題准。遺失科鈔者。罰俸兩月。○十七年議准。遺失紅本者。降一級留任。

○二十五年議准。官員將

誥敕質當者革職。或蟲蛀損傷。或潮溼破壞染汙。及

差人道路差錯者。皆罰俸六月。如被水火盜賊

毀失者。免議。仍准題請重給。

今增為文武官員
割付旗牌等項被

水火盜賊毀失者
亦照此例辦理

○雍正二年。山西巡撫題參

河東運判護理運司將

欽頒運司

上諭並未查收交代奉

旨著免議此不過朕之訓飭諭旨無甚關礙嗣後朕之訓旨或致遺失水溼染汙毀壞該督撫提鎮行文內閣奏明給予不必題參○乾隆四年議定凡已進呈之本章應行發出者如批本處未發內閣即行參奏內閣未發部院即行參奏該部院未經行文督撫即行參奏不必轉相詢問若將進呈後之本章批本處及內閣遺漏未曾交出別經發覺始行查發將經手遺漏之員比照將表文遺

漏遞延例罰俸一年同日該班不行檢查之員照不行詳查例罰俸六月奏事處亦照此例若已經交出到部而遺漏不行知照該處各咨行事件已經議結不行文該處者將遺漏行文之員照議處經手遺漏各員例察議至於已經移咨該處而他處或有遺漏未經知照者照遺漏行咨例罰俸兩月○又議准凡有降罰承追等案一經奉

旨考功司即行文知照文選司其補官日帶於新任降罰者應於該員補官日文選司行文知照如

有遺漏不行知照者。將司官照遺漏行咨例罰俸兩月。書吏治罪。三十年奏准。在內在外議降議革大員奉

旨後。吏部將該員緣事原案備細鈔錄一體行文。原籍督撫以便稽查。○又奏准。歷年准行條奏事件。如有沈閣未行者。即查明定限補行。若有不便行者。該衙門據實題明更正。並造具遵依清冊。咨部查覈。儻有陽奉陰違遺漏。沈閣等弊。一經發覺。查條遺漏照經手遺漏例議處。如係沈閣。照沈匿官文書律查議。○又奏准。吏部文選

司題稿房筆帖式科二處專司滿官銓選往來文移多係清字揀選諳練事務掌稿筆帖式各二人掌管如所辦檔案有遺漏及舛錯照處分司官例議處至隱匿印文更改檔案等弊查出題參治罪○又奏准除咨部院密奏事件毋庸開送內閣外其摺奏事件奉旨准行之後即將原摺並所奉

諭旨一併鈔送內閣與具題紅本一體收藏以備稽

查

積壓本章○嘉慶二十年

諭吏部等衙門奏議處刑部積壓本章堂司各官一摺
各部院事件俱關緊要朕歷經訓諭令該堂官遇事隨到隨辦應題奏者即行題奏應引見者即行引見勿蹈因循疲玩之習諄諄告誡至再至三刑部為刑名總匯案牘繁多尤當勤敏將事乃本月初九日刑部題本二十三件內立決者多至二十二件人犯多至五十二名總緣平時積案既多及將屆封印紛紛趕湊未免草率遂致一時岔集且近日該部自請議處之案不一而足如曲朱氏係應擬絞監候永違監禁之犯誤寫為秋後處決又本年秋審冊內遺漏二

案又題本內十九年誤寫為二十年。又安徽省處決人犯行文遲逾例限種種錯誤即予黜革亦屬咎所應得但其中亦有區別董誥現在因病告假伊年逾七旬精神不能周到軍機處事務繁多不必管理刑部著改為管理兵部事務崇祿韓崶彭希濂俱係刑部司員出身且常川在署辦事其咎較重崇祿著革去紫禁城內騎馬韓崶著革去花翎俱降為二品頂戴彭希濂降為三品頂戴伊三人俱革職留任恩甯穆彰阿年力方壯派令兼署刑部召見時諭令其留心學習乃不思奮勉於部務全不究心甚屬可惡俱

著降為三品京堂。再觀後效。現有大理寺卿一缺。即著恩甯補授。穆彰阿著以正從三品京堂候補。盧蔭溥在軍機處事務較繁。甚屬盡心。暫署刑部不能到署辦事。此不過一時疏忽。著加恩改為降二級留任。漢本房係專辦題本之處。各司交到本章。並不分析。勦配具題。其咎尤重。主事得壽年昌阿隆文俱著照部議革職。其各司承辦遲延之候補郎中董斯福員外郎豐伸泰誠齡章慶治候補主事趙協中俱著從寬改為革職留任。○又

諭昨因刑部本章積壓。封印期內不能呈進完竣。准令

改題為奏。此不過暫時權宜。不可為例。若各衙門因
可改題為奏。相率效尤。恐因循疲玩。將來積壓之件。
愈多。不可不加以懲處。除刑部堂官及前案已議處。
各司員毋庸再議外。著刑部將逾限本章逐一查明。
將各該司員職名。咨交吏部概行議處。

欽定大清會典事例卷一百十五

吏部

處分例	遺失印信	契用印信	漏用印信
	印信模糊	改用印信	妄用印信
領牌文	空白印信	溢行出結	始結冒
建坊銀	隔屬用印	印買人	都移年月用
印某止無印小票	科場		

遺失印信○康熙二十五年定在外各官印信如在署存儲或係行窩存儲被賊徑行竊去。有印官革職五日內自行拏獲究辦開復原參處分。未經行用減為降一級調用已經行用減為降二級調用。一月內自行拏獲未經行用減為

降三級調用已經行用減為降四級調用。如非自行尋獲仍不准減議至適遇公出派有員弁隨行齋送或乘船偶遇風浪沈溺或被火延燒有顯迹者一時倉猝失檢不能尋獲將轉派員弁革職留任本員未能先事豫防議以降三級留任若在署封儲遇有水火猝不及防以致毀失者將本員革職留任五日內自行尋獲開復原參處分係革職留任者減為降一級留任係降三級留任者減為罰俸二年一月內自行尋獲係革職留任者減為降二級留任係降三級

留任者減為降一級留任在京各衙門印信係封
儲在署當月直宿官員專司監守如有竊失專司
監守之員革職有印官革職留任五日內拏獲究
辦開復原參處分未經行用專司監守之員減為
降一級調用有印官減為降一級留任已經行用
專司監守之員減為降二級調用有印官減為降
二級留任一月內尋獲未經行用專司監守之員
減為降三級調用有印官減為降三級留任已經
行用專司監守之員減為降四級調用有印官減
為降四級留任至在署封儲偶遇水火猝不及防

以至毀失者。專司監守之員。革職留任。有印官降三級留任。五日內尋獲。開復原叅處分。係革職留任者減為降一級留任。係降三級留任者減為罰俸二年。一月內尋獲。係革職留任者減為降二級留任。係降三級留任者減為降一級留任。○雍正三年議准。遺失印鑰印牌之案。即將遺失之員。降一級留任。不准抵銷。遇有應行升轉之缺。概停升轉。三年無過開復。其僅止遲誤。請領印鑰。並無遺失情事者。罰俸一年。

誤用印信。○康熙九年議准。官員應用堂印事

件誤用司印。應用司印。誤用堂印。及署事官兼轄官錯用印信。皆罰俸三月。倒用印信亦照此例處分。○雍正三年議准地方民務大小公事皆用題本。用印具題。本身私事。皆用奏本。雖有印信之官。亦不准用印。若違定例題奏。通政使司衙門查叅。交部照誤用印信例罰俸三月。

漏用印信。○乾隆四年議准地方各官往來文移。以及呈報上司事件。均於正面鈐印。如有刮補字樣。以及增註錯落。於接扣之處。均鈐蓋印信。儻有遺漏鈐蓋者。照各衙門行移文書漏用印信律。

罰俸一年。○三十七年奏准各省督撫等拜發奏摺。俱於夾板之外。用棉榜紙封固。接縫處黏貼印花。其奉差出京官員。照例領取兵部印花備用。如有遺漏黏貼印花者。照遺漏用印例罰俸一年。

印信模糊。康熙九年題准印信模糊。或不請換。或本章咨文用印模糊。由部查出者。將不請換印之官罰俸六月。如督撫將更換情由。不行咨題者亦照此例處分。詳請更換之官免議。如印信損壞已換給新印。不將舊印繳送者。亦照此例處分。○

雍正八年議准鑄印局鑄造印信關防。筆畫錯誤。

將不行磨對之鑄印局各官罰俸六月。不行驗明之堂官罰俸三月。其領印之員於領受之時不將錯誤之處驗看聲明。日後被人查出者。將領印之員亦罰俸六月。○又議准屬員請換印信。該上司收取使費者革職。○乾隆二年議准官員請領新印遲延如逾四月以外。由禮部覈明日日咨明吏部照欽部事件遲延例議處。其接到新印不繳還舊印者亦照事件遲延例議處。上司不行催領及不行催繳者俱罰俸三月。

盜用印信。○乾隆十年奏准盜用印信之案。該

管官自行查出者免議。若失察盜用已行者降一級調用。未行者罰俸一年。如於行用後自行查出究辦減為降一級留任。尚未行用別經發覺。自能獲犯究辦減為罰俸六月。

妄用印結牌文。康熙十五年議准官員豫給用印白結者罰俸一年。今改為降一級調用○又題准職官擅寫牌文給予族人者革職。今改為給才不應給之人者革職○五十二年議准濫給家僕門子印結捐納官職及濫給因罪革退衙門人役印結復入衙門者皆革職○雍正四年議准地方各官妄用印信及非正

印官而擅用印信者。皆降一級調用。○十二年議准各省藩臬鹽道知府設有經歷。凡文移往來。令其公同用印。其經歷印信悉歸經歷自掌。如擅將經歷印信收掌自用。致生挪移作弊。該督撫題參將擅收經歷印信自用之員。照妄用印信例降一級調用。○又議准五城一應曉諭禁約等事。應於各該地方通衢張貼印示外。其一切官民鋪戶門首。應令五城御史嚴飭各該司坊官。不得濫給印示。儻有不肖之人。仍前濫給者。該御史一經見聞。立即題參。將該員照妄用印信例議處。若係吏役。

人等受賄求託本官給發者除該員照例議處外並將吏役交刑部治罪若該城御史見聞既實並不叅奏者或別經查出或被科道糾叅即將該城御史照不行詳查例議處今改為不行查者罰俸一年再順天

府經歷照磨及大宛兩縣間有出給印示者一倒嚴禁儻有徇情濫給者亦照司坊官之例議處其不行查叅之各該上司亦照巡城御史之例議處空白印信○乾隆二年覆准各部院衙門行移事件司官回明堂官用印將所行事件並用印數目登記號簿其在外各衙門下行牌票並上

行平行文移。均令鈐印編號一應空白。悉令嚴行禁止。儻有仍用空白。事發將不行稽查。之在內堂官在外督撫司道照不行詳查。例罰俸六月。今改為罰俸一年。不行回明用印之司官。及仍用空白之府州縣等官。皆照豫給用印白結例罰俸一年。今改為降級調用。如有督撫司道向州縣提取空白文結者。亦照此例罰俸一年。今改為降級調用。○五年覆准。內外大小凡有印信衙門。均於封印前一日。酌量件數。各用空白印紙。並文移封套。以備封印後遇有緊要公文之用。仍各登記號簿。在京衙門呈堂收存。外省

衙門同印信在內衙存儲有緊要文書方行填用開
印後除用去者登記冊籍外將所存件數各堂官
及各印官驗明銷毀如有官吏藉端作弊及該堂
官該督撫各上司不行查出者皆照禁止空白印
信例分別議處書吏照例治罪今增為如失察書
吏藉端作弊該管
官照失察書吏舞文弄法例議處通同作弊
者革職失察之該堂官及該上司罰俸一年

濫行出結○康熙二十九年題准地方官代頂冒
人員出結者革職○雍正十二年覆准候選揀選
人員例用同鄉京官印結凡出結各官務令本衙
門設立號簿將出過印結緣由登記簿內每至月

終按照數目緣由彙送清冊呈堂。咨部查覈。如冊內無名。即傳赴選人員究問。僅有豫用空白印結者。令該堂官照豫給空白例。叅處。○乾隆三十七年奏准。凡一切甘結及同鄉京官印結。向例不用印文。並戶部衙門有關錢糧案件。照舊取結辦理外。其餘具題事件。及詳咨移文內。向例於文外復取結者。停止印結。如遇有濫冒出結之案。各該衙門即據其文查明應議職名。開送吏部。照例議處。○嘉慶五年奏准。鄉會試及一切考試入場之人。如有頂替作弊。出結官降一級留任。至入場後另

有聯號代倩等弊。出結官免議。如該省並無五六品京官認識出結。即取具七品以下同鄉京官圖結。出具隔省五六品京官印結投遞。如有違礙。將出具圖結之員照本例議處。加具印結之員減一等議處。○又奏准。凡身家不清及頂冒之人。有捐納職官者。出結之同鄉京官降一級留任。州縣官不行查明。濫給文結赴選者。革職轉詳之府州降一級調用。督撫藩司罰俸一年。其赴部後另有頂替情弊。於地方官無涉者。即將出結之同鄉京官革職。其有捐納職銜貢監者。止係頂戴榮身。無關

銓選出結之同鄉京官罰俸一年。州縣官不行查
明。率行結報者降一級調用。今改為降一級留任如係現充
該衙門卑隸之子孫及本任內曾經犯案治罪者。
查明係屬縱容加級不准抵銷。轉詳之府州罰俸
一年。督撫藩司免議。○道光九年。

諭嗣後捐納各官例由本籍起文赴選者著責成地方官
取具該員族鄰甘結。加具印結送部。其隨任赴選人員。
著責成本任官出具文結。至例由本員具呈註冊銓選
者即責成同鄉京官出具確實印結。均令於文結內詳
敘捐生出身履歷。此內如有降革人員報捐並令將該

員從前曾任何項官職。緣事降調案由一併詳細註明。
以憑查覈。儻有徇隱。除將蒙捐原官之員隨時奏明辦
理外。並將出具文結各官照徇隱例議處。○十二年奉
准各部院衙門司員遇有本公司辦理事件概不准
其出結。如有率行出結者。照違令私罪律議處。

又議准各省人員投供赴選以及報考報捐等事。
五城正指揮實授者准其出結。其揀選候補署事
代理者不准出結。○二十九年議准凡冒濫出結
應行議處之案由吏部經咨各該衙門如捐納則
咨戶部考試則咨禮查取原出結官職名照例議處不必行
部之類

奏原義。○咸豐十一年

論。給事中高延祜奏。捐官流品混雜。請飭令出結官認真稽查等語。近來捐例繁多。流品不一。全賴各省出結官認真稽查。以杜弊混。若如該給事中所奏。近日各官出結。多虛應故事。有名無實。以致身家不清白之人。皆得蒙捐出仕。無從指摘。更難保無匪徒混迹其間。實屬有干禁令。嗣後各省有自俊秀貢監以及舉職虛銜捐官者。先令取具親友互保。到局對認無誤。方准出結。其餘各項報捐人員。亦皆詳究來歷。毋任蒙混。儻有前項情弊。除出結官照例議處外。其管

理印結局官員。該部查取職名。二併嚴加議處。○同

治元年

論。御史興奎等奏。請飭吏部查辦職官冒名頂替。並嚴定出結官失察處分等語。職官冒名頂替。俗有飛過海之稱。名是人非。相率為偽。實屬大干法紀。著吏部認真查辦。如何稽覈祛弊。嚴定章程具奏。至各省京官印結係為防弊而設。嗣後各省出結官員。如有失察捐生舞弊革職者。不准援照向例捐復。以重責成而除積弊。欽此遵。

旨議准。嗣後有身家不清。假冒頂替之人。報捐以前。另

犯姦贓不法等事。因案發覺。其同鄉京官濫行
出結。應查照定例。從嚴議處。失察者降三級留
任。不准抵銷。知情者降三級調用私罪。隱匿不
舉。並通同舞弊者革職。不准捐復。至總司查覈
之員減等定擬。如查結官知情容隱。即議以降
三級調用。通同舞弊者仍革職。不准捐復。○十
三年定。捐納候選京外各官。及各項分發人員。
各省五六品出結京官。旗員由本佐領出具圖結務須查明
該員實係身家清白。並無隱匿犯案。改名蒙捐
等弊。方准銓選分發。如有身家不清。及假冒頂

替同鄉京官溢行出結者。照例議處。其報捐指
省及勞績保舉留省分發驗看人員。應於印結
內聲明並未在該省先行寄籍置買田產。並非
向來流寓。及祖父亦未置有產業。本身及父子
胞兄弟。胞伯叔姪。向未曾在該省開設典鋪。及各
項經商貿易。亦未曾曾在該省督撫司道府廳州
縣衙門裏辦刑錢等事。方准驗看分發。仍行文
該省查明有無隱匿等弊。專咨報部。如有隱匿
不報。或捏稱前項。希圖改省者。將本員從嚴懲
辦。出結官照例議處。由俊秀監生初捐人員。及

各館供事京外吏員出身者。無論月選分發揀選。概令取具同鄉京官實係本身並無頂替印結。出結官於

欽派驗看大臣面前呈遞。

旗員由本佐領
出具圖結至遞

驗看揀選

分發到省後。令該員在省同鄉官員識認取結報部存案。捐納人員內。如有報捐以前犯有姦賊不法等事。因案發覺。其同鄉京官。濫行出結者。從嚴議處。總司稽查之員減等議處。取結人員。有無各項違礙情弊。出結官須先期查明。再行出結。不准於驗看及引。

見後呈請和留執照業經銓選分發人員。有身家不清等弊。續經出結之員查出。准其據實檢舉。寬免處分。

給結冒領建坊銀。○乾隆四年議准。凡請領節婦建坊銀。如係再醮之人。應行議處。以結官者。令各該處即將知情濫給。與並不知情之處。於咨疏內據實聲明。如知係再醮。不應請領之人。濫行出結請領者。將出結之人照徇情給結例降二級調用。如實係不知再醮緣由。冒昧給結後。經自行檢舉者。照不行查明給結例罰俸一

年不行詳查之該管官照不行詳查違為轉報
例罰俸六月○嘉慶五年奏准恭遇

覃恩如有各項違礙之人同鄉官不行查明給予印
結請領

封典者罰俸一年其捐請

封典者亦照此例議處○又奏准地方官結報節婦
不實者降一級調用轉詳之府州罰俸一年

隔屬用印買人○康熙八年題准旗人買民人
者用本管地方官印信若在隔屬官用印給予
之官照拏解良民例降一級留任如有將定例

以後所買之人。詭作定例以前年月日用印給予者。將地方官並買賣之人皆加等治罪。

挪移年月用印○康熙八年議准。凡將定例後事件。作為定例以前年月日期用印給予者。將用印之官降一級調用○乾隆二年議准。內外衙門案件。有挪移年月等弊。該管官知情用印者革職。止於失察者降一級留任。

禁止無印小票○乾隆六年覆准。各省文武大小衙門。凡一切差票。均令鈐蓋印信。如無印信。衙門即用鈐記。所有硃標小票衙單。永行禁止。

儻有仍用無印小票衙單者。令該上司不時查報題參。將出無印小票之員。照文移遺漏鈐蓋印信例罰俸一年。

科場○順治十五年議准順天府暨各省布政使解卷遲延十日者。罰俸兩月。仍詳查原文起解月日。係本官遲延者。責在本官。如與本官無涉。係解役遲延者。由該管官從重治罪。○又題准官員不將正身書手選送。或送雇替之人。或送不堪用之人者。罰俸一年。○又題准墨卷錯落題字。及文內失格違禁。後場違式。真草不全。

等項應貼不貼者。受卷所官各降一級調用。如受卷官將不應貼而貼出者。一卷罰俸三月。二卷罰俸六月。三卷罰俸九月。○又題准。謄寫硃卷。係謄錄官專責。亦有謄錄所錯落數行。對讀所對出改正者。如竟不經心對讀。任錯不改。謄錄對讀官各罰俸九月。今改為每卷罰俸三月○又題准。場內所取中卷。宜三場徧閱。有同考官藍筆未經點到者。降一級調用。主考官不能覺察者。各罰俸一年。○又題准。場中如墨筆添改。罪在主考。將主考官降三級調用。藍筆添改。罪在本房。

將本房同考官降三級調用。○又題准中式硃卷面應先填舉子名次後填姓名其墨卷面雖有舉子姓名亦應填寫名次如違主考官各降一級調用。○十六年議准謄錄所用硃對讀所用紫今改用緋黃如擅用別色者該所官降一級調用。○十七年議准卷面列主考本房同考官職名各註批語不得遺漏錯亂如有違式不列及署名顛倒者責在主考將主考各降一級調用罰俸一月。○又題准各省鄉試外簾官將科目及正途出身之知縣教官今教官不開選一併取用儻

有推託規避者。罰俸一年。知府徇私不查報者。
罰俸六月。○康熙七年題准墨卷題字。及四書
五經文章策論表判內字有錯訛。謄錄不照原
字。謄自行改正。對讀官不行對明。徑送內簾。一
卷謄錄對讀官各罰俸九月。二卷各罰俸一年。
三卷各降一級調用。四卷各降二級調用。五卷
各降三級調用。六卷以上革職。今改為每卷其各罰俸三月。其墨卷錯字。硃卷已改正。內簾正副主考同考官
均不知。免議。○又題准收卷官將卷面籍貫不
明。不行詳看駁回者。經管收卷官各罰俸六月。

彌封官將卷面籍貫不明不行詳看即錯印者。經管彌封官各罰俸六月。今改為罰俸三月。主考官原

照所編字號中式如外簾錯編字號移送內簾於拆看時未及查出者正副主考官各罰俸六月。○又題准前場卷錯印後場卷號後場卷錯印前場卷號者其經管官罰俸三月。○又題准

經營試卷用印官將試卷號印重印及用印模糊者其經管用印官各罰俸三月經營木印官將木號印重送及移送木號印字模糊者經營木印官各罰俸三月。○九年題准應試舉人貢

監生員等姓名。點名冊內錯寫者。其司點名冊官各罰俸三月。○又題准彌封所不將試卷用條記移送謄錄所者。彌封官各罰俸三月。謄錄所見彌封所失印條記不行呈明令其補印條記私自差役投送者。謄錄官各罰俸三月。謄錄書手姓名誤寫卷面者。謄錄官查出不行呈明及不行查出各罰俸三月。○又題准受卷所官將書經卷誤收詩經卷內交送彌封所彌封所官又不詳查錯印詩經字號送內簾者受卷彌封官各罰俸三月如有自行檢舉呈明改正者

免議。○十二年題准。墨卷未落。硃卷謄錄遺句。
主考抹出。同考官未經抹出者。罰俸六月。今增
主考
官未經抹出者。罰俸三月。其舉入行文筆誤。罰停會試一科。
儻未經抹出。同考官每一卷罰俸一年。正副主
考各罰俸六月。○又題准。冊卷相同。錯寫貼示
字樣者。經管貼示官。罰俸三月。○十五年題准
主考官場內發題。如遇卯辰二時。不將題紙全
發出者。將正副主考官。各罰俸六月。○又題准
正副主考官遺批取中字樣。同考官遺漏薦字
者。皆罰俸六月。○又題准。正副主考官。一次出

題錯字。各罰俸三月。本經同考官。各罰俸六月。
今無本經同考官處分冊

正副主考官。二次出題錯字。各罰俸六月。本經同考官。各罰俸九月。正副主考官。三次出題錯字。各罰俸九月。本經同考官。各罰俸一年。自行檢舉者。正副主考官。各罰俸三年。本經擬題同考官。各罰俸六月。○十八年議准。闈中閱卷。每官闈分硃卷若干。即於卷面上打某經今無某經本印。某房木印。如某房有弊。即將本房本官處分。如舉子應點革一名者。同考官即應革職。舉子黜革二名以上者。同考官革職。提問。

舉子黜革一名者。正副主考官降二級調用。黜革二名者。降三級調用。黜革三名以上者。革職。

今改為非因文字黜革者同考主考官俱免議

舉子罰停會試三科者。

每一名同考官降一級調用。正副主考官各罰

俸一年。罰停會試二科者。每一名同考官降一級留任。正副主考官各罰俸九月。舉子罰停會

試一科者。每一名同考官罰俸一年。正副主考

官各罰俸六月。

今曾為罰俸處。亦照此例議處。○又議准

考官私訪聚談薦卷私通小帖所閱硃卷私帶入房。主考同考暗帶主文幕友隨入內簾。將硃

卷埋藏偷換。凡係場內目擊情弊。御史

今改內監試官。

內廉監試之道府等官。增皆降二級調用。二十五年議准

官員失落試卷者罰俸一年。如染汙損裂者罰俸六月。○又議准官員將黜革之人入考者降一級調用。○又議准各省主考官出闈之後許住省數日。刊刻試錄事竣。遵限回京。不得任意遲延。如有疾病事故。仍照例取州縣官印結報部存案。若無故在外任意耽延。不行即回者。各該衙門查參。照參差不復任例議處。○二十六

年覆准官員奉文移取入簾推託不赴者罰俸
一年。○三十九年覆准中式冒籍舉人其收考
送考出結官並學臣及地方官教官照定例處
分其主考官免議如舉人貢監生員濫認父母
假冒籍貫品行不端者或被宗族鄰里告發或
被科道糾參查審明確即行斥革交送刑部如
有查覈不詳草率令其考試者照混行收考例
降一級調用其行查不據實呈報者照假冒出
結例革職如冒籍之父兄在現任地方令其子
弟冒籍者革職若不肖之徒賄買舉人及代為

營謀者。事發。皆從重治罪。○六十年議准。保定等衛軍戶。仍照舊例考試。但恐不肖之徒。改名易姓。假冒衛籍。令該府縣及教官查明。出具保結。中式後。有冒籍頂名等弊。將頂冒之人。照假官例治罪。送考及出結官員。照徇庇例處分。○雍正元年議准。中式之人。有聯號換卷。傳遞埋藏。夾帶文字等弊。審實。將不行查出之監臨。提調。監試。巡查各官。照容隱例降二級調用。外廉按檢各所官。照溺職例革職。如有通同作弊受賄者。交送刑部計職治罪。○又議定。如有下第

諸生不安義命。妄行闖鬧者。立即拏送刑部嚴審。若內簾外簾果有情弊。將各官照例嚴加治罪。若毫無實據。逞其私忿。將本人照光棍例治罪。如該管官不行查拏。照容隱例降二級調用。

○又覆准考官出場。或正考官風聞中式之人。與副考官同考官有弊。正考官即行舉奏。或副考官風聞中式之人。與正考官同考官有弊。副考官即行舉奏。並同考官風聞中式之人。與正副考官別房同考官有弊。即行舉首。將中式之

人請

旨覆試。本官免其失察處分。儻主考同考官明知而不舉。或經科道糾參。或被旁人首告。文刑部審實治罪。○六年覆准。科場除違式應貼之卷。收卷官照例呈明監臨貼出外。其應送彌封所試卷。每十卷收卷官即用紙包裹固封。送彌封所如收卷官將試卷與提調等官先行翻閱。在京許監試御史。外省許監臨指名題參。將收卷並提調等官。各降二級調用。儻有指示改正等弊。將收卷官並監臨官。皆降三級調用。如監試御史。監臨官隱匿疏漏。不行題參。別經發覺。各降

二級調用。其試官閱卷必將後場試卷盡行細
加校閱。首場雖佳而二三場草率者不得取中。
若首場雖屬平通而後場明確通達者亦得取
中。不得專重頭場忽略後場如經磨勘策判今無
利有勸襲雷同者將主考房官一併題參議處。
○十三年議准鄉試之年應試諸生如有因本
房無官卷之例捏造出繼或已經出繼因本房
有官卷之例改回本房及本房已經降革而子
孫弟姪猶指稱官卷並以恩養螟蛉混入官卷
者或經告發除本房革職本生黜革照例治罪

外將該教官州縣官皆降二級調用。知府直隸州知州降一級調用。布政使官降一級留任。巡撫學政罰俸一年。○乾隆元年議准。順天鄉試外簾官將小京官及額外主事。守部進士今外不
行開列等官內開列具題。其庶吉士停其開列。儻有推託規避者。罰俸一年。○又議准。鄉會試主考同考官除同姓無服。兩經覆准。無服本
族照舊迴避。與郎舅中表等戚不必迴避外。兩又議准。妻之兄
弟胞妹之夫胞姑大其有服同姓與翁婿甥舅。皆令迴避。如不將應迴避之人開出者。革職。○三年議准。各

學教官。務將科場條規。平時傳集諸生。嚴行訓諭。務使臨場懷遵成憲。如有不遵約束。紊亂場規者。該監臨官查參。將該教官降一級調用。若該學政於士子科舉時。不憑文字之優劣。濫行收錄。將該學政罰俸一年。○三十四年覆准場內取中試卷。有主考官未經點到者。主考官降一級留任。○又議定。磨勘鄉會試卷各官全無籤摘。及籤摘不當。塞責了事者。概不准予議敘。如磨勘官果能秉公糾舉。經覆勘大臣校勘。俱各允當。奏准。

鑒定者。事竣後。禮部移咨吏部議敘。准其紀錄一次。
若奉

特旨交部議敘者。准其加一級。○又議定外省鄉試
官卷冒考。道員降一級留任。罰俸一年。○三十
五年覆准彙送總冊錯誤者。學政罰俸六月。誤
填卷面經書今不填。年貌及廩增字樣。與卷冊
互異者。教官罰俸六月。未經查出之學政。罰俸
三月。○三十六年覆准。主考官仍用墨筆。房考
官改用紫筆。今改房考官。如墨筆添改。罪在主
考。將主考官降三級調用。紫筆添改。罪在本房。

將房考官降三級調用。儻主考官未將紫筆添改處查出者。罰俸一年。○三十七年議定磨勘鄉會試卷各官分勘各卷。通行覆算。於疵謬之處全未勘出。經覆勘大臣勘出。將原勘官降一級調用。若將疵謬字句籤出一二。雖覆勘時另有增易。毋庸復行交議。如派出磨勘之員。託故推諉者。罰俸一年。仍責令磨勘完竣。照例察議。若全無籤摘。禮部將該員存記俟下科再遇磨勘時。會裏查辦。如仍未籤摘一卷者。疏漏實所難辭。仍照例處分。○又奏准受卷官將不應貼

而貼出者。罰俸一年。儻有墨卷空補錯落題字。

及文內失格違禁。汙墨越幅。後場違式。真草不

全等項。應貼不貼者。亦罰俸一年。

今增為其應示貼之卷錯

寫事由書罰俸三月○又奏准中式卷內文詩策論。有全

篇雷同勦襲者。正副考官一卷各罰俸六月。二

卷各罰俸九月。三卷各罰俸一年。四卷各降一

級調用。五卷各降二級調用。六卷各降三級調

用。七卷以上革職同考官。一卷罰俸九月。二卷

罰俸一年。三卷降一級調用。四卷降二級調用。

五卷降三級調用。六卷以上革職。○又奏准主

考同考官有交通作弊一應採名受賄聽情關
節夤緣中式事發審實將考官革職文刑部從
重治罪其父兄為子弟作弊有官者亦革職提
問○又奏准場內經書備有官板其別項書籍
亦應取官板備用如往書坊貨辦者經營官罰
俸三月○又奏准國子監肄業之貢監生有紊
亂場規者將學正學錄等官照教官例議處該
堂官照學政例議處○又奏准商竊籍生員及
各衛軍戶各省科場中式後有冒籍頂名等弊
將造冊送考之學政等官均照混行收考例降

一級調用保送之府州縣及教官照濫結例分
別議處。四十年

諭科場條例。毋許臨場條奏文會試不得過上年冬月。
武會試不得過本年春月。嗣後如再有違例臨期陳
奏者。該部將其事於議覆摺內一併將該員察議具
奏。又覆准中式試卷解部磨勘除字訛句落止將
該所官察議外。儻有全卷潦草不成字體者。按
照卷尾姓氏籍貫行令該督撫查明原起送之
地方官嚴叅議處。嘉慶五年奏准。考官出題
不拘忌諱。如仍出時下熟習擬題及割裂小巧。

牽連無理。或詩題引用僻書私集者。照出題錯字例議處。○又奏准策題每問過三百字。或自問自答。或以己見立說。或援引

本朝臣子學問人品者。均照出題錯字例議處。○又奏准詩題正書賦得某題旁註得某字五言八韻。遺漏違式者。照出題錯字例議處。○又奏准試卷內句股錯誤者。同考官罰俸一年。主考官未經改正者。罰俸六月。○又奏准

廟諱

御名各偏旁字樣。謄錄不敬謹缺筆書寫。主考官未

經抹出罰俸一年。同考官未經抹出降一級調用。今增為其有不諳例禁直書本字者主考同考官雖經掣出仍照此例議處○又

奏准試卷內字句疵謬無關通體文義者主考官未經抹出每卷罰俸六月同考官未經抹出罰俸一年詩內平仄失黏亦照此例議處其題目字畫小差或文內字句小疵及無心筆誤不關弊竇者免議○又奏准內監試漏印薦條者罰俸六月試卷重用薦條者同考官及內監試均罰俸三月硃卷應印第幾房印記如有重用漏用者經管官罰俸三月○又奏准撥房中式

式之卷。有應行議處房考者。止將受撥之房考處分。原薦官免議。○又奏准。

廟諱

御名各偏旁字。謄錄不依原卷敬謹缺筆書寫。對讀未經對出者。謄錄對讀官均罰俸一年。○又奏准。對讀不查照原卷點句句股者。該所官罰俸三月。對讀官對出錯誤。應用赭黃筆改正。有誤用紫筆者。罰俸三月。○又奏准。中式之人。如有埋藏夾帶文字。責在外場按檢各官。將外場按檢官革職。所官免議。其聯號換卷傳遞等弊。查

係何所之事。該所官不能查出者降一級留任。
如各所有攪換洗補試卷等弊。該所官亦照此
例議處。○又奏准文鄉會試外簾官外省令監
臨官將合例之員行文調取在京令禮部行文
各衙門將合例之員咨送開列具題儻有奉文
調取推託不赴者罰俸一年該堂官上司不行
查報者罰俸六月其外省內簾官推託不赴者
亦照此例議處。○六年奏准房官批語誤用墨
筆者罰俸三月。○十一年奏准大宛二縣申送
應試童生經滿漢御史覆審時如有審音不實。

濫行申送者。將原審官照混行收考例降一級調用。係屬知情。降三級調用。今改為知情者不准抵銷。不知其抵銷。

○又奏准。

文武生員緣事革審者。係具

題之案。部文到日。該督撫即行知會學政係外

結之案。承審官於事結後。限一月內鈔招錄案。

申報學政秉公查閱。分別除名開復。如承審各

官遲延不報。罰俸一年。儻遇鄉試之年。因承審

官遲延不報。以致該生尚未開復。有誤考期者。

降一級調用。○十三年奏准。從前冒籍已經出

仕。及未經出仕各員。均准其自行呈明。改歸原

籍除吏員供事不准改歸原籍外。其在寄籍由應試報捐議敘現任職官及候補候選人員並非土著。其係外省寄籍而原籍地方尚有墳墓田廬應改歸原籍者限一年之內呈請改歸原籍。母許再跨寄籍如在寄籍地方置有產業已至二十年以上者限一年之內照例呈請入籍母許再跨原籍統俟部文到日為始一年限內自行呈明者母庸議處如逾一年之限始行呈明照違令私罪例罰俸一年儻經奏明以後如再有寄籍倅邀出仕別經發覺者即行革職○

又奏准大宛二縣考試歲考廉保八名。科考六
名。其寄籍補廉者。雖經呈明入籍已久。不准派
充考後不准託詞補送。仍於每次考試時。令該
廉保各出具並無假冒甘結。由教官查覈加結。
申送府丞學政衙門。於審音時。仍令該御史詳
加查覈。如有假冒。即行嚴參。該管官不實力稽
查。仍照例議處。○道光十二年奉

旨。嗣後各該旗遇有應編官卷。其試卷應註明官字。如
有混入民卷取中者。比照各省辦理官卷蒙混出結。
及蒙混造冊各員處分例。查係本家漏報。將本官革

職本空黜革。查係佐領漏報。將該佐領降二級調用。
並將不行詳查之參領降一級調用。如墨卷本有官
字。硃卷漏印官字。戳記將承辦之員降一級調用。○

十七年奉

旨。此案提調官順天府治中資鎮衡。於童生雯錦冒考。
既經參領指出槍替。未能立時拘拏。以致乘閒逃逸。
非尋常疏於防範者可比。資鎮衡著降一級留任。不
准抵銷。嗣後關涉科場處分。無論大小官員。俱著吏
部照例議處。專摺具奏。將應否准其抵銷之處。聲明
請旨。毋庸具題。以昭慎重。○又

諭。前因鄉會試試卷繁多。彌封官四員。果否足敷辦理。
並如何責成知貢舉監臨等稽查。酌定處分之處。降旨令軍機大臣會同該部議奏。茲據奏稱科場定例。本極周詳。彌封一所。關繫甚重。止在經理之得宜。不在人數之增設。至知貢舉監臨總理場務。例有稽查之責。向無處分。即該所官處分亦輕。請從重定議等語。嗣後鄉會試仍照例用彌封官四員。即責成知貢舉監臨。擇其年力富強。精明幹練者先行派定彌封。毋須與各所官掣籤。以昭慎重。並著知貢舉監臨隨時稽查。務令遵照定例。親自印號。不准假手書吏。其

有漏印條記。用印模糊。覈與弊竇無關者。仍著照舊辦理。至錯印紅號。有關士子中式者。每卷該所官照遺漏外錯例罰俸一年。知貢舉監臨失於查察。照疏忽例罰俸三月。三卷以上。該所官降一級留任。知貢舉監臨罰俸九月。如查有情弊。立即嚴參。儻知貢舉監臨不行參處。別經舉發。除該所官照例究治外。知貢舉監臨照徇情例降二級調用。以上各處分俱不准其抵銷。其外簾受卷謄錄對讀收掌各所官。著一併責成知貢舉監臨認真稽查。以歸畫一。二十三年奏准。謄錄所官一次無過。紀錄一次。三次無

過加一級。○咸豐九年

諭上年順天科場一案失察子弟遞送關節條子之尚書陳孚恩等應得處分均經吏部照例議以降一級調用並聲明公罪例准抵銷業已先後照議允准朕思科場定例向多從嚴其失察子弟夤緣犯法與尋常失察處分亦當有所區別若概議以公罪似未允協嗣後官員凡遇子弟有於科場夤緣納賄交通關節失於覺察者俱著降一級調用照私罪例不准抵銷○同治十三年奏准中卷內全卷全篇蓋筆未經點到者同考官每卷降一級調用失於覺察之

主考官罰俸一年。若墨筆未經點到。主考官每卷降一級留任。其僅止數行或數句。藍筆未經點到者。同考官每卷降一級留任。失於覺察之主考官。每卷罰俸九月。墨筆未經點到者。主考官每卷罰俸一年。○又奏准。中卷內文藝詩策有勦襲雷同者。本生罰停二科。如同在一房。同考官每卷降一級留任。主考官每卷罰俸九月。其全篇勦錄舊文倖邀中式者。本生斥革。如無雷同。主考官免議。雷同非在一房。同考官免議。○又奏准。磨勘官於所分各卷全無籤摘。禮部

即將該員存記。若下科再派磨勘，仍未籤摘一
卷者，罰俸一年。○又奏准

議摘指應議職而高
不得以免議職合計

考官向磨勘官分送所刊闡墨及磨勘官竟行
收受者，均照不應重私罪律降三級調用。○光
緒六年奏准。州縣官保送謄錄務選正身書吏
之樸實善書者，毋許雇替。如有不善書寫及雇
替之人，經收驗官駁回，或於磨勘時查出全卷
潦草，不成字體者，將起送之州縣官，每名罰俸
一年。驗收之府尹布政使等官，未能先期駁換
每名罰俸三月。○九年奏准。對讀所官一次無

過紀錄一次三次無過加一級。○又奏准考試教習正場及覆試出結識認各官如有託故不到者除將該士子扣除點名外其識認不到之員照外簾官推託不赴例罰俸一年。○又奏准印造鄉會試卷不依定例尺寸篇幅或多或少者將監造官照違令公罪律罰俸九月。○又奏准受卷官吏一手接卷一手發籤如不即給發以致擁擠遺失者罰俸三月。○又奏准彌封所截印紅號墨卷號必與硃卷相對頭場號必與二三場號相對卷號必與簿號相對如有錯印

漏印重印者。每卷罰俸三月。○八年奏准科場
埋藏夾帶。責在搜檢。傳遞換卷。責在巡綽。其聯
號割卷。攬改洗補等弊。責在四所。如搜檢巡綽
及各所官。有失察夫匠軍役書吏家人舞弊者。
降一級留任。明知故縱者。革職。受賄者。交刑部
計贓治罪。其監臨提調監試等官。失於查察。如
搜檢巡綽及各所官。應革職者。降二級調用。應
降留者。罰俸一年。○又奏准。士子夤緣納賄交
通關節者。從重治罪。其父兄為子弟作弊。有官
者。革職治罪。若主考同考各官。通同作弊。一併

革職治罪。○又奏准。凡鄉會試之年。該管衙門先期出示嚴禁。如有棍徒假捏撞騙。汙累考官及士子等。央浼營求。致被誑騙。並於發榜前後。挾餌造謠。匿名訐告。以及下第諸生。不安義命。往考官處肆行攬鬧者。即行查拏治罪。如該管官失於查拏。降二級調用。○又奏准。直省布政使順天府官。將鄉試中式硃墨卷解部磨勘。違限十日以上者。罰俸一年。○又奏准。同考官遺漏加批。至填榜時。誤用墨筆補寫者。每卷罰俸三月。硃卷內有墨筆浮籤未去者。主考官每卷

罰俸三月。有藍筆浮籤未去者。同考官每卷罰俸三月。○又奏准。凡有言責官員條奏科場作弊。文會試不得過上年冬月。武會試不得過本年春月。如有臨期條奏者。照違令公罪律罰俸九月。